

Efesios

¹ Høøch xøhajt Pablo. Høøch hädaa nocy njahby. Ja'a Dios jaduhñ mänaañ coochä Jesucristo xwyiinguéxät. Mijts hädaa nocy nyajnäjaayøøby pønjatiä Diosmädia'agy mäbøjp jim maa ja'a cajpt jaduhñ xiøhatiän Efeso, pøn-jatiä Jesucristo miädia'agy jim hoy yajtúunäp. ² Weenä Dios hajxy xmio'oy ja'a hoyhajt ja'a weenhajt, møødä Jesucristo. Ja'a Dios hajxy nDeedyhájtäm. Ja'a Jesucristo hajxy nWiindsøñhájtäm.

³ Tsøgä Dios hajxy wiingudsähgøøyyäm. Ja'a Jesucristo, Dyioshajpiä Dios je'eduhmbä; y jaduhñ je'e Tieedyhajpä. Coø ja'a Jesucristo hajxy xmiøødhájtäm tu'ugmädia'agy, paadiä Dios tsajpootypä ja'a mayhajt madiu'u tiuñ ja'a højtscøxphájtäm. ⁴ Cahnä hädaa yaabä naaxwiin hånajty chohnda'agy, tøøyyämä Dios hajxy hånajty xwyiimbíiwäm coø ja'a Jesucristo hajxy xmiøødhájtämät tu'ugmädia'agy. Jaaná jaduhñ hajxy xwyiimbíiwämbä coø hajxy hoy njäya'ayhájtämät, coø hajxy nga'a cädiéhyämät, jaduhñ hajxy wa'ads hoy nhájtämät maa ja'a Dioswiinduumän. ⁵ Coø ja'a Dios hajxy xchójcäm, paadiä Jesucristo yaa quiejxä hädaa yaabä naaxwiin ja'a højtscøxphájtäm. Paadiä Dios ja'a Jesucristo yaa quiejxy coø ja'a Dios hånajty tøø wyiinmay coø hajxy xyhuunghadäänäm. Hamdsoojootä Dios jaduhñ miänaañ coø hajxy xyhuunghájtämät. ⁶ Tsøcxä Dios hajxy wiingudsähgøøyyäm coø hajxy xjiaançh tehñ chójcäm, coø ja'a Jesucristo yaa quiejxä maa højtshájtäm. Jaduhñä Dios ja'a mayhajt møj tiuunñ ja'a højtscøxphájtäm. Paady hajxy xchójcäm coø ja'a Jesucristo hajxy xmiøødhájtäm tu'ugmädia'agy. Hiç, jaançh tehñ chójcäbä Jesucristo

ja'a Tiéediäm. ⁷ Coo ja'a Dios hajxy jaduhñ xjiaančh tehñ chójcäm, paadiä Jesucristo hajxy yaa hoy tøø xñäh-ho'túutäm, jaduhñä nbojpä ngädieey hajxy xyajnáhwaats xyajcuhwáatsäm. Jaduhñä Dios hajxy xmiée'xäm. ⁸ Coo hajxy jaduhñ xjiaančh tehñ chójcäm, paady hajxy hoy tøø xyajwiinjuøyyäm nebiaty jaduhñ tøø wyiinmay ja'a højtscøxpä. ⁹ Tøø ja'a wyiinmahñdy hajxy xyhawáanäm ja'a hijty jaduhñ quiuyu'chpä. Hamdsoojootä Dios jaduhñ tøø wyiinmahñdyhaty. Chojpiä jioot hánajty jaduhñ coo ja'a mayhajt hánajty tiuna'añ ja'a højtscøxphájtäm. ¹⁰ Jaduhñä Dios tøø wyiinmahñdyhaty coo ja'a Jesucristo Wyiindsønhadøjät cøxiä tijaty jim tsajpootyp, møødä tijaty yaa hádaa yaabä naaxwiin. Coo ja'a Dios jaduhñ yaghabáadät, mänit hánajty tiøjiada'añ coo ja'a Jesucristo jaduhñ Wyiindsønhadä'añii.

¹¹ Ja'a Dios, yajtøjajpy je'eduhñ nebiaty je'e wyiinmay. Hoorä, jéquiänä Dios wyiinmaayy coo højts ja'a yHuung xyajnáhwa'ads xyajcuhwá'adsät, højts judiøspä, coo højts jaduhñ nmøødhídät tu'ugmädia'agy. ¹² Jéquiän højts ja'a nhap ja'a ndeedy ja'a Dios ja'a miädia'agy hajxy tiägøøyyä mäbójcäbä coo højts xyajnáhwa'ads xyajcuhwá'adsät. Hoorä, paadiä Dios jaduhñ jecy wyiinmaayy coo højts ja'a yHuung xyajnáhwa'ads xyajcuhwá'adsät, jaduhñä jäya'ayä Dios hajxy nägøxiä wyiingudsähgø'øwät coo jiaančh tehñ miøjjä coo jiaančh tehñ jiaančhä. ¹³ Y mijts ja'a ca'a judiøspä, jaanä jaduhñä Dios tøø wyiinmaabiä coo mijts ja'a yHuung xyajnáhwaats xyajcuhwáatspät. Y jaduhñ hajxy tøø mmäbøjpä coo ja'a yHuung hajxy tøø xyajnáhwaats tøø xyajcuhwaatspä. Jaančh tehñ tiømiä-diaacpä Dios jaduhñ. Coo hajxy jaduhñ nmäbójcäm, paadiä Dios ja'a yHEspíritu yaa tøø quiexy maa højtshájtäm, jaduhñä tøyhajt hajxy nmøødhájtäm coo ja'a Jesucristo hajxy tøø xjiaančh yajnähwaats tøø xjiaančh

yajcuhwáatsäm. Hiḡ, jéquiänä Dios jaduhḡ miänaañ cooc ja'a yhEspíritu hänajty quiexa'añ maa ja'a jäya'ayhajx-iän, ja'a miädia'agy hajxy hänajty mäbójcäbä coo hajxy hänajty yajnähwa'ads yajcuhwa'adsa'añii. Jaduhḡä Dios ja'a tøyhajt hajxy xmióoyyäm coo hajxy hoy miänaajä xcwieendähadaañäm. ¹⁴ Y coo ja'a Dios ja'a yhEspíritu tøø jiaančh quejxnä maa højtshájtäm, jaduhḡä tøyhajt hajxy nmøødhájtämbä coo hajxy jim xyajnøcxáañäm maa ja'a wyiinduumän. Jaduhḡä DioshEspíritu hajxy xmiøødhidáañäm høxtä coonä yhabáadät coo ja'a Dios hajxy jim xyajnøcxämät maa ja'a wyiinduumän, y coo ja'a Dios ja'a mayhajt jaduhḡ tiuñ ja'a højtscøxphájtäm, páadiäts hajxy nwiingudsähgøøyyämät coo jiaančh tehḡ miøjjä coo jiaančh tehḡ jiaančhä.

¹⁵ Nmädóyhøch jaduhḡ coo ja'a Jesús ja'a miädia'agy hajxy tøø mmäbøjcä, ja'a hajxy nWiindsønhájtämbä. Jaduhḡhøch nmädóyyäbä coo hajxy mdsocy mba'häyoy pønjetiä Diosmädia'agy panøcxp. ¹⁶ Coočh jaduhḡ nmädoyyä, páadyhøch Dios Dioscujú'uyäp nmo'oy ja'a mijtsøxpä hoy miänaajä, coočh hänajty nDiospa'ya'axy ja'a mijtsøxpä. ¹⁷ Nmänuu'xtáacypiøčhä Dios coo ja'a wyiinmahḡdy hajxy jaduhḡ ween xmiø'oy ja'a yhEspirituhaam, y coo ja'a wyiinmahḡdy hajxy jaduhḡ ween xyajwiinjuø'øy. Dioshájtäbä Dios ja'a Jesucrístäm, ja'a hajxy nWiindsønhájtämbä. NDioshájtämä Dios hajxy. Møj jaančh je'e. Hawiinmats hajxy jaduhḡ nwiingudsähgøøyyämät. ¹⁸ Jaduhḡhøčhä Dios nmänuu'xtaACPä coo hajxy ween xyajwiinjuø'øy coo je'e tøø wyiinmay coo hajxy jim xyajnøcxáañäm maa ja'a wyiinduumän. Paady hajxy jim xyajnøcxáañäm coo hajxy xyhuunghájtäm. Jaančh tehḡ yhoy jaančh tehḡ yajxón hajxy jim nhidáañäm. ¹⁹ Weenä Dios hajxy xyajwiinjuøøbiä coo møcmäjaa jiaančh tehḡ miøødä, coo ja'a miäjaahaam hajxy xpiuhbéjtäm coo ja'a

miädia'agy hajxy nmäbójcäm coo tiömiädia'agy. ²⁰ Jaanä miäjaahaamä yHuung jaduñ yagjuyjpiöjtägajtspä. Mänit jim yajnøcxy maa ja'a wyiinduumän. Mänit ñämaayy coo yhöxtá'agät maa ja'a quiø'ø hahooyhaampiän. Jimä Jesucristo ja'a Tieedy miøødhanehmnä. ²¹ Ni põnä cuhdujt jaduñ quia'a nä'ägädä mөөdä nebiä Jesucristo mõjcu-dujt miøødän, ni jim tsajpootyp, ni hädaa yaabä naaxwiin. Ni põnä cuhdujt mänaa quia'a mөөdhada'añ nebiä Jesucristo mõjcu-dujt miøødän. ²² Jaduñä Jesucristo piädaacä coo cøxiä wiinä yhané'emät hoy miaajä. Jaduñ je'e piädäacäbä coo højts nWiindsønñájtämät coo ja'a miädia'agy hajxy nmäbójcäm coo tiömiädia'agy. ²³ Hoyyä Jesucristo cøxiä wiinä jia hane'emy hoy miaajä, coo hajxy jaduñ nmäbójcäm, xjiotcädäacäm hajxy jaduñ coo hajxy xmiøødhjtämät tu'ugmädia'agy. Ni tii jaduñ quia'a jootcädaacy neby højts xjiotcädäacäm.

2

¹ Jue'e mijts hijty, cabä Dios hajxy hijty mwiingud-sähgø'øy, je'eguiøxpä coo ja'a pojpä cädieey hajxy hijty mmөөdä, coo ja'a Diosmädia'agy hajxy hijty mga'a cud-iuñ. ² Jaančh tehñ yhaxøøgtuum hajxy hijty mnä'ägädä hity. Jaduñdsä jäya'ayhajxy yhity ja'a Diosmädia'agy hajxy ca'a mäbøjpä. Ja'a mõjcu'ugong ja'a miädia'agy hajxy hijty mmäbójcäp. Jaayá'ayäts mõjtuungmөөd tsajtcøxp. Yhanehñby jaduñ põnjatiä Diosmädia'agy ca'a mäbøjp. ³ Jaduñ hajxy hijty nägøxiä njatcøyyämbä. Haxøøg hajxy hijty nwädjítäm nebiä njootä ngopc-hajxy hijty chójcäm. Paadiä Dios hajxy hijty xyajcumädowáañäm nägøxiä näguipxy mөөdä haxøøgjäya'ayhajxy. ⁴ Pero hojiootä Dios jiaančh tehñ miøød. Xjiaančh tehñ chójcäm hajxy. ⁵ Hoyyä Dios ja'a miädia'agy hajxy hijty

nga'a ja cudiúunäm, ja'a miäjaahaamä Dios ja'a nwiinmahñdyhajxy tøø xyajtägájtsäm, nebiä miädia'agy hajxy jaduhñ hoy ngudiúunämät, nebiä Jesucristo yagjujyp-iøjcän ja'a Tieediä miäjaahaam. Coø ja'a Dios hajxy xjiaançh tehñ chójcäm, paady hajxy tøø xpiädáacäm hawa'adstuum. ⁶ Nebiä Dios ja'a Jesucristo yagjujypiøjtä-gajchän, jaanä jaduhñ højts xyagjujypiøjtägatsáanämbä. Tøø hajxy xpiädáacäm coø ja'a Jesucristo hajxy nmøødhíjtämät tu'ugmädia'agy. Y nebiä Dios ja'a Jesucristo ja'a cuhdujt miooyyän coø jim miähané'emät tsajpootyp, jaanä jaduhñ højtsä cuhdujt xmio'owáanämbä. ⁷ Paadiä Dios ja'a cuhdujt hajxy jaduhñ xmióoyyäm, jaduhñ yajcähxø'øga'añ coø hojiot jiaançh tehñ miøødä maa højtscøxpän, coø hajxy xjiaançh tehñ chójcäm. Paadiä Jesucristo yaa quiejxä hädaa yaabä naaxwiin; paady hajxy hoy xñähho'túutäm. Jimä Dios hajxy hoy miänaajä xyaghidáanäm maa ja'a wyiinduumän. ⁸ Cab hajxy hamdsoo tøø nhawa'adspädsøømäm. Ja'a Dios hajxy tøø xpiädáacäm hawa'adstuum. Paady hajxy xyaghawa'adspädsøømäm coø hojiot jiaançh tehñ miøødä, coø hajxy nmäbøjcäm coø hojiot miøødä. ⁹ Coø ja'a nbojpä ngädieey hajxy hamdsoo tøø nga'a yajniñähwáatsäm, paady hajxy hamdsoo nga'a niguiumáayyämät, hoy hajxy tøø nja hojiäya'ayhajtäm. ¹⁰ Hix, tøø ja'a Dios ja'a nwiinmahñdyhajxy xyajtägájtsäm coø ja'a Jesucristo hajxy xmiøødhíjtäm tu'ugmädia'agy. Tøø ja'a Dios ja'a mäjaa hajxy xmióoyyäm neby hajxy hoy nhíjtämät. Jéquiänä Dios jaduhñ wyiinmaayy coø hajxy jaduhñ hoy nhíjtämät.

¹¹ Hoorä, højts judföspä, yajcumaaby højts jaduhñ coø højts nyajcircuncidarhaty. Jaduhñ højts tyijy yajcähxø'øgy coø højtsä Dios xquiu'ughaty. Coø højts jaduhñ nyajcircuncidarhaty, je'eduhñ ñänøømby coø højtsä seña nbäda'agy maa højtsä nni'xcøxpän. Paady

højts mijts nxøøghaty, mijts ca'a judíospä, coo hajxy mga'a yajcircuncidarhjäpä. Tøyhajt jaduñ. ¹² Hiç, højts judíospä, ja'a Dios højts jecy xquiu'ughajt. Jaduhñ højtsä Dios xmiøødyajcuñdujcy coo højts hñajty xya-jñähwa'ads xyajcuñwa'adsa'añ. Pero mijts ca'a judíospä, caj mijtsä Dios xñämaayy coo mijts xquiu'ughada'añ, coo mijts xyajñähwa'ads xyajcuñwa'adsa'añ. Hiç, cahnä Diosmädia'agy hajxy hñajty mmädoyñä ja'a Cristocøxpä. Paady hajxy hijty mga'a najuø'øy coo mijts ja'a Dios xyajñähwa'ads xyajcuñwa'adsaambä. ¹³ Caj mijtsä Dios hijty xquiu'ughaty. Cabä Diosmädia'agy hajxy hijty mmädoyyä. Pero coo ja'a Jesucristo hajxy tøø xñähho'tu'udy, paadiä Dios hajxy xquiu'ughajnä. ¹⁴ Coo ja'a Jesucristo hajxy tøø xñähho'túutäm, jaduñ hajxy tøø xpiädáacäm tu'ugmädia'agy nägøxiä, møød højts judíospä näguipxy møød mijts ca'a judíospä. Hamiñ haxøpy hajxy hijty nnimiädsiphájtäm. Pero tøø hajxy nnimiägapxó'cänä je'eguiøxpä coo ja'a Jesucristo hajxy tøø xñähho'túutäm. ¹⁵ Højts judíospä, mijts hijty nmøødnimiädsiphájtäp, mijts ca'a judíospä. Hiç, højtsä Dios jecy xyhaneñm madiu'u, ca'a myijtsä. Mänitä Moisés quiujahy nebiaty højtsä Dios xyhaneñmy, y coo ja'a Jesucristo hajxy hoy xñähho'túutäm, paadiä Dios ja'a mädia'agy yaghamaadiujnä nebiä Moisés hñajty jecy tøø quiujaayän. Jaduhñä Jesucristo hajxy tøø xpiädáacäm tu'ugmädia'agy møød je'e, møød højts judíospä näguipxy møød mijts ca'a judíospä. Paady hajxy nga'a nimiädsiphájtänä hamiñ haxøpy neby hijtiän, højts judíospä møød mijts ca'a judíospä. ¹⁶ Coo ja'a Jesucristo hajxy tøø xñähho'túutäm cruzcøxp, paadiä Dios hajxy tu'ugmädia'agy xmiøødhíjtänä, møød højts judíospä näguipxy møød mijts ca'a judíospä. Cabä Dios hajxy jaduñ nmädsiphájtänä.

¹⁷ Hoyyä Jesucristo hajxy xyhawáañäm coogä Dios

ja'a jioot quia'a tsocy coo ja'a Dios hajxy nga'a mäd-siphájtänät. Jadúhñägä jioot chocy coo hajxy nmøød-híjtänät tu'ugmädia'agy nägøxiä, møød højts judíospä näguipxy møød mijts ca'a judíospä. ¹⁸ Hix, coo ja'a Jesucristo hajxy nägøxiä tøø xñähho'túutäm, paadiä Dios hajxy nägøxiä nmøødhíjtänä tu'ugmädia'agy, møød højts judíospä näguipxy møød mijts ca'a judíospä. Ja'a yh-Espírituhaam hajxy jaduhñ xyajmøødhíjtäm tu'ugmädia'agy nägøxiä. ¹⁹ Xquiu'ughájnäp mijtsä Dios møødä jáya'ayhajxy nägøxiä, ja'a Diosmädia'agy hajxy mábøjpä, hoy hajxy mga'a jagä judíospä. Xyhuunghájnäbä Dios hajxy jaduhñ. Cabä Dios hajxy hijty xquiu'ughaty xyhuunghaty, coo ja'a miädia'agy hajxy hijty mga'a mábøjcä. ²⁰ Coo ja'a Jesucristo hajxy hoy tøø xñähho'túutäm, mänit je'e hoy jiuypíøjtägach. Mänitä Diosquexy ja'a Diosmädia'agy hajxy tiägøøyy yajwa'xpä. Mänitä Diosmädia'agy hajxy nmábøjcäm. ²¹⁻²² Paadiä Jesucristo hajxy xmiøødhíjtäm tu'ugjoot tu'ugwiinmahñdy coo ja'a Diosmädia'agy hajxy näguipxy nmábøjcäm, møød højts judíospä, møød mijts ca'a judíospä. Hix, tøø ja'a Dios hajxy xyajnähwaats xyajcuhwáatsäm ja'a nbojpä ngädieeyhájtäm. Ja'a yhEspírituhaam hajxy jaduhñ xyajmøødhíjtäm tu'ugjoot tu'ugwiinmahñdy.

3

¹ Høøch Pablo, páadyhøch chaa ndsumyçhäna'ay coöchä Jesucristo miädia'agy nyajwa'xä maa mijtsän, mijts ca'a judíospä. Coo ja'a Jesucristo hajxy tøø xpiädáacäm tu'ugmädia'agy nägøxiä, páadyhøchä Dios nba'ya'axy ja'a mijtsçøxpä. ² Tøø hajxiäda'a mmädoyhaty coöchä Dios tøø xwyiinguexy coo mijtsä Diosmädia'agy nyajwiingapxø'øwät, coo ja'a Dios ja'a hojioot miøødä ja'a mijtsçøxpä. ³ Jéquiänä Dios wyiinmaayy coo højtsä nbojpä

ngädieey xyajnáhwaats xyajcuhwáatsät, hõjts judíospä. Nnajuøøby hõjts hijty jaduhñ. Pero cuyu'uçhä Dios hijty yaghity coo hánajty tøø wyiinmaabiä coo mijts xyajnáhwa'ads xyajcuhwa'adsaambä, mijts ca'a judíospä. Hoorä, tøøçhä Dios hädaa mädia'agy xyajwiinjuøøñä nébiøch hädaa mädia'agy weenjaty chamñ njaayän. ⁴ Coø hädaa mädia'agy hajxy mgápçät, jaduhñ hajxy nnajuø'øwa'añ cooçhä Dios ja'a mädia'agy tøø xyajwiinjuø'øy, ja'a Jesucristocøxpä, ja'a cuyu'uçh tøø yhiätiäbä. ⁵ Cab hädaa mädia'agy hijty pønñ miädooyä. Pero tøø ja'a Dios ja'a wyinguexyhajxy yajwiinjuøøñä. Ja'a yhEspírituhaam jaduhñ yajwiinjuøøyy. ⁶ Jaduhñ hajxy nnajuøøyyäm coo ja'a Dios jecy wyiinmaayy coo ja'a Jesucristo hajxy hánajty xñähho'tu'udáañäm, coo hánajty jiuypjøjtägatsa'añ. Y coo ja'a Diosmädia'agy hajxy nmäbøjçäm, paadiä Jesucristo hajxy nägøxiä nmøødhjätäm tu'ugjoot tu'ugwiinmahñdy, møød hõjts judíospä näguipxy møød mijts ca'a judíospä. Jaduhñä Dios hajxy nägøxiä xyhuunghjätäm. Tu'ugmädia'aguiä Dios hajxy jaduhñ xyaghjätäm ja'a Jesucristocøxpä. Paadiä Dios hajxy jaduhñ xyajnáhwaats xyajcuhwáatsäm coo ja'a Jesucristo hajxy hoy tøø xñähho'túutäm. Jéquiänä Dios jaduhñ wyiinmaayy.

⁷⁻⁸ Ja'a miøcmäjaaháamhøçhä Dios tøø xtiuunçmo'oy cooçh ja'a miädia'agy nyajwá'çät maa ja'a ca'a judíoshajxypän. Xtiuunçmóoyyhøçhä Dios jaduhñ cooçhä judíoshajxy nyajwiingapxø'øwät coo Dios ja'a mayhajt mõj may tiuna'añ ja'a hõjtscøxpähjätäm, je'eguiøxpä coo ja'a Jesucristo hajxy hoy tøø xñähho'túutäm. Hojiootä Dios miøød, páadyhøch jaduhñ xtiuunçmooyy, hõyhøch nga'a jagä mäna'añ cooçh nga'a tsoobaady cooçh jaduhñ ndúnät, hõyhøch nja mäna'añ coo ja'a Dioshuunghajxy miaas tsoobáadät, coo hajxy jaduhñ tiúnät. ⁹ Jaaná jaduhñhøçhä Dios

tøø xtiuunngmoobiä coočhä jäya'ayhajxy nägøxiä nyajwiinjuø'øwät coo ja'a Dios jecy wyiinmaayy coo mijtsä Jesucristo hānajty xyajnahwa'ads xyajcuhwa'adsaambä, mijts ca'a judíospä. Mānitä Dios jaduhñ wyiinmaayy mānaa cøxiä wiinä yhädiuñän. Cab hajxy xchoj yajwiinjuøyyäm. Jecy jaduhñ yaghijty cuyu'učh. ¹⁰ Hoorä, coo ja'a Jesucristo hajxy nägøxiä tøø xyajnahwaats tøø xyajcuhwáatsäm, møød højts judíospä näguipxy møød mijts ca'a judíospä, coo ja'a Diosmädia'agy hajxy näguipxy nmäbójcäm coo tiømiädia'agy, jaduhñä Diosmoonsä hajxy jim ñajuøøñä tsajpootyp coo ja'a Dios jiaančh tehñ quiuwiinmahñdiä madiu'u. Haa ca'a, xyhíxämä Diosmoonsä hajxy coo hajxy tu'ugmädia'agy jaduhñ nhíjtänä. ¹¹ Jaduhñä Dios ñä'ägädä wiinmaayy jecuiän, jajty hädaa naaxwiin yhädiuuñ. Jaduhñ yajtøjiajty coo ja'a Jesucristo hajxy hoy xñähho'tuútäm, ja'a hajxy nWiindsøn'hájtämbä. ¹² Coo ja'a Jesucristo hajxy nmøødhíjtäm tu'ugmädia'agy, coo ja'a miädia'agy hajxy nmäbójcäm, jaduhñä tøyhajt hajxy nmøødhíjtäm coo ja'a cuhdujt hajxy nmøødhíjtäm coo ja'a Dios hajxy nba'yáaxämät. Jaduhñä tøyhajt hajxy nmøødhíjtämbä coo hajxy xmiädóowäm. ¹³ Mijts nmānuu'xtaacypy coo hajxy mga'a jootmayhädät, hóyhøch yaa nja tsaächpøcy. Páadyhøch chaa ndsaaächpøcy coočhä Diosmädia'agy nyajwa'xy maa mijtsän. Páadiäts hajxy jaduhñ mxoonďá'agät.

¹⁴⁻¹⁶ Ja'a nWiindsøn'hájtäm Jesucristo, Dios je'e Tieedyhajpy. Tieedyhajpiä Dios hajxy je'ebä pønjaty jim tsānaaby tsajtcøxp møød pønjaty yaa tsānaaby hädaa yaabä naaxwiin. Coo ja'a Jesucristo hajxy tøø xpiädáacäm tu'ugmädia'agy møød højts judíospä näguipxy møød mijts ca'a judíospä, páadyhøchä Dios hamuumdu'joot nmānuu'xta'agy coo mijtsä mājaa ween

xmio'oy ja'a yhEspírituhaam, neby hajxy jaduñä mjuøhñdyhaam mme'e'xtúgät. Xpiuhbédäbä Dios hajxy jaduñ je'eguiøxpä coo je'e miøjjä jiaančhä. ¹⁷ Jadúhñhøčhä Dios nmänuu'xtaacpä coo ja'a Jesucristo yhEspíritu hajxy ween mjaac møødhajtä, je'eguiøxpä coo ja'a miädia'agy hajxy mmäbøjcä. Jaduñ hajxy hoy yajxón mničhoc mnimiee'xøøjät hoy miänaaxøøjä. ¹⁸⁻¹⁹ Y jaduñ hajxy mwiinjuøbiät coo ja'a Jesucristo hajxy xjiaanč tehñ chójcäm møj may. Hanaxiä hajxy jaduñ xjiaanč tehñ chójcäm. Cab hajxy ca'xy nwiinjuøyyäm nebiaty hajxy jaduñ xjia tsójcäm. Cab hajxy pedyii nwiinjuøyyäm. Coo hajxy hoy nwiinjuøyyämät, hoyyä nwiinmahñdyhajxy jiadaañäm nebiä Dios ja'a wyiinmahñdiän.

²⁰ Jaanč tehñ miäjaamøødä Dios. Ja'a miäjaa-haamä nwiinmahñdyhajxy xyajtägájtäm. Jaanä miäjaa-haamä mayhajt møj may tiuumbä ja'a højtscøxphájtäm. Høxtä cab hajxy hoy nwiinjuø'øwáañäm nebiatiä mayhajt jaduñ tiuuñ. Møj mayyä mayhajt jaduñ tiuuñ, hoy hajxy nga'a jagä mäyujwáañäm. ²¹ Tsøgä Dios hajxy hoy miänaajä wiingudsähgøøyyäm, coo ja'a miädia'agy hajxy nmäbøjcäm, je'eguiøxpä coo ja'a Jesucristo hajxy tøø xñähho'túütäm. Tøyhajt jaduñ.

4

¹ Coočhä Jesucristocøxpä nduñ, páadyhøch chaa ndsumyčhäna'ay. Coo mijtsä Dios tøø xyajnähdiij coo hajxy hoy mwädítät, paady hajxy jaduñ mgudiúnät. ² Cab hajxy myajcumáyät. Mee'xxieemy hajxy mhídät. Mmee'xtúgäp hajxy jaduñ. Hamiñ haxøpy hajxy mničhoc mnimiee'xøøjät. ³ Naxy hajxy tu'ugcopc tu'ugwiinmahñdy mdehñ yhídät. Ja'a Dioshespíritu hajxy jaduñ xyaghídäp tu'ugmädia'agy. ⁴ Tu'ugmuquiä

Jesucristo miädia'agy hajxy nbanócxäm, mөөд һөјts judíospä näguipxy mөөд mijts ca'a judíospä. Tu'ugmuquiä Dioshespíritu hajxy nmөөdhájtäm. Nägөxiä Dios hajxy xyajnáhdíjjäm coo hajxy jim xyajnöcxáanäm maa ja'a wyiinduumän. Tu'ugmucy hajxy jaduһñ njөbhíjxäm. ⁵ Tu'ugmuquiä Jesucristo hajxy nWiindsөnhájtäm. Tu'ugmuquiä miädia'agy hajxy nmáböjcäm coo tiөmiädia'agy. Ja'a Jesucristocөxpä hajxy nägөxiä nnábéjtäm. ⁶ Tu'ugmuquiä Dios hajxy nDeedyhájtäm nägөxiä. Jaaya'ay hajxy xyhanéhmäm nägөxiä. Ja'a һөјtsөxphájtäm jaaya'ayä mayhajt tiuunñ nägөxiä. Jaaya'ay hajxy hoy xmiөөdhíjtäm nägөxiä.

⁷ Cөjhawiingatiä Jesucristo hajxy tөө xyajnáhdíjjäm nebiaty hajxy ndúunämät. ⁸ Jaduһñä Diosmädia'agy miäna'añ:

Coo jim ñөcxy tsajpootyp, tsumiä miädsip yajnөcxy, ja'a hajxy һänajty tөө quia'a mäjädá'aguiäbä.

Mänitä jiamíөөд madiu'u miooyy cөxiä wiinä.

⁹⁻¹⁰ Coo jaduһñ miäna'añ coo ja'a Jesucristo ñөcxy tsajpootyp, jaduһñ miäna'ana'añ coo һänajty yaa tөө yhoy һädaa yaabä naaxwiin. Jim һänajty tөө yhuuc tsoһñ-daacpä tsajpootyp. Y coo jim ñөcxtägajch Dioswiinduum, jim möj jaančh yhijnä. Jim jaduһñ yhaneһmnä tsajpootyp mөөд һädaa yaabä naaxwiin. ¹¹ Ja'a Jesucristo һөјts xpíä-daac coo һөјts madiu'u ndúnät jaaya'aguiөxpä. Näje'e һөјts xyajnáhdijy coo һөјts ndúnät apóstol. Je'ečh jaduһñ nnänөөmby coo һөјtsä Jesucristo xquiejxtsoһñ Diosmädia'agy-yajwa'xpä wiinduhmyhagajpt. Näje'e hajxy yajnähdíjjäbä coo ja'a Diosmädia'agy hajxy jiaac yajwá'xät. Näje'e hajxy yajnähdíjjäbä coo ja'a Diosmädia'agy hajxy yajwiingapxó'өwät. Näje'e hajxy yajnähdíjjäbä coo ja'a Diosmädia'agy hajxy yajnähixó'өwät. Näje'e hajxy yajnähdíjjäbä coo hajxy quiopc-hádät maa ja'a her-

manodøjc-hajxy yhamugø'øyän Dioswiingudsähgøöbiä. ¹² Paady hajxy jaduhñ tiuñ, jaduhñä Diosmädia'agy hajxy maas hoy quiudiúnät coo ja'a Diosmädia'agy hajxy miäböcy. Jaanä jaduhñ hajxy tiúumbät ja'a Dioscøxpä. Jaduhñ hajxy maas hoy wiädítät nägøxiä coo ja'a Jesucristo hajxy pianøcy. ¹³ Jaduhñä Dios ja'a miädia'agy hajxy tu'ugmucy hoy nmäböjcämät nägøxiä coo tiömiädi-a'agy ja'a Jesucristocøxpä. Y jaduhñä Jesucristo hajxy hoy nmødhjítämät tu'ugmädia'agy, ja'a Dioshuung. Jaduhñä Diosmädia'agy hajxy maas hoy nwiinjuóyyämät. Jaduhñ hajxy maas hoy nyajtúunämät. Mänit hajxy hoy nwiinmäayyämät nebiä Jesucristo wyiinmayyän. Y jaduhñ hajxy hoy nwädíjtämät nebiä Jesucristo hoy wiäditiän. ¹⁴ Pønjetiä Diosmädia'agy hoy ca'a wiinjuøöbyñä, jaančh tehñ piaquiä hajxy yajwiinhøøñ. Hoy tyii mädia'aguiä hajxy miäböga'añ. Hix, ja'a häna'c-hajxy mäwiinhøh-mbä, jiaančh tehñ jiajpy hajxy mäwiinhøøn. Jaančh tehñ piaquiä hajxy jaduhñ xwyiinhøønät. Pero højtshájtäm, cab højts jaduhñ nyajwiinhøhñämät. ¹⁵ Pero, tsøg hajxy tøgüápçäm, tsøg hajxy tømíadiácäm. Tsøg hajxy tsójçäm, tsøg hajxy méé'xäm pønjaty hajxy nmødmädiácäm. Jaduhñ hajxy hoy nwädíjtämät nebiä Jesucristo hoy wiäditiän, ja'a hajxy nWiindsønhájtämbä. ¹⁶ Coö hajxy nhjítämät tu'ugmädia'agy, coö hajxy nnibihbéjtämät hamiñ haxøpy nebiatiä Dios hajxy tøø xtiungmóoyyäm, jaduhñä Jesucristo hajxy xpiuhbéjtämät, neby hajxy jaduhñ maas hoy nniçhojc nnimiéé'xämät hamiñ haxøpy, nebiä Diosmädia'agy hajxy jaduhñ maas hoy nwiinjuóyyämät, neby hajxy jaduhñ maas hoy ngudiúunämät.

¹⁷⁻¹⁹ Pønjetiä Diosmädia'agy ca'a panøcxp, cab hajxy miøjpäda'agy tijaty jaduhñ tsoobaatp. Cab hajxy tii wyiinjuø'øy. Jaančh tehñ xiexä jiootä quiopc-hajxy; paady

hajxy quia'a wiinjuø'øyy coo ja'a Dios ja'a møjmayhajt tøø tiuñ ja'a højtscøxphájtäm, paady hajxy quia'a cumayii ja'a Diósäm. Tsähdiuhndägoy hajxy jaduhñ. Hanaxiä hajxy yhaxøøgjatcø'øyy cøxypänejpiä. Paady mijts jaduhñ nmägapxy nhane'emy ja'a Jesucristocøxpä coo hajxy jaduhñ mga'a pajatcøøbiät. ²⁰ Coo hajxy tøø mhabøcy ja'a Jesucristocøxpä, paady hajxy mnajuø'øyy coo jaduhñ quia'a hoyyä coo hajxy jaduhñ mga'a haxøøgwädíjnät, neby hajxy naamnä tøø nmägapxy tøø nhane'emiän. ²¹ Tøyhajt jaduhñ coo hajxy tøø mhabøcy ja'a Jesucristocøxpä. Jaaya'ay hajxy xyajnáhixøøyy ja'a yhEspírituhaam. Hiḫ, tøgüiapxp tømiädiaacp je'e. ²² Jaduhñ hajxy xyajnáhixøøyy coo ja'a mhaxøøgcuhdujt hajxy mnajtshixø'øwät neby hajxy hijty mhaxøøgjäya'ayhatiän. Mdu'udägoyyaamb hajxy hijty je'eguiøxpä coo hajxy hijty cøxiä wiinä mhadsocy, cooc tyijy hajxy hijty jaduhñ mbaada'añ ja'a hoyhajtä weenhajt. Pero myajwiinhøhmb hajxy hijty. Hiḫ, cabä hoyhajtä weenhajt hajxy jaduhñ mbáadät. ²³ Pero, yajtägatsä mjootä mwiinmahñdy hajxy. ²⁴ Tøø ja'a Dios hajxy xmióoyyäm ja'a hawiinjembä howyiinmahñdy nebiä Dios hajxy jaduhñ hoy nbahíxämät. Jaduhñ hajxy tøyhajt hoy mjäya'ayhádät. Jaduhñ hajxy tøyhajt haxøøg mga'a wädíjnät.

²⁵ Jaduhñds je'e, cab hajxy mhøhndáacnät. Tøyhajt hajxy mmädiáacnät. Hiḫ, tu'ugmädia'agy hajxy nhíjtäm.

²⁶⁻²⁷ Coo hajxy tähoocjaty mnimiäjootma'adóøjät, paquiä hajxy jadähooc mnimiägapxó'cägumbät, coo ja'a møjcu'ugong hajxy jaduhñ paquiä xñä'ä yajcädiéeyät.

²⁸ Pønjaty mee'tsp, cab hajxy mié'e'tsnät. Ween hajxy tiuunnä, jaduhñä wiingjäya'ay hajxy piuhbédät pøn jaduhñ yajmaajajp.

²⁹ Cab hajxy mhaxøøgcápxät. Coo hajxy hoy mgapx mmädiá'agät, jiaac wiinjuø'øwaambiä jäya'ayhajxy,

ja'a homiädia'agy hajxy hoy mädoobä. Jaduhñä Dios ja'a mayhajt tiünät jaaya'aguiøxpähajxy, ja'a hajxy jaduhñ mädoobä. ³⁰ Cabä Dioshespíritu hajxy myagjootmadiäg'øwät. Hix, jaaya'ay hajxy jaduhñ xcwieendähadaañäm høxtä coonä ja'a Jesucristo hñajty yaa quiädaactägatsa'añ. Mänit jaduhñ quiäxø'øga'añ coo hajxy hñajty tøø xyajñähwaats tøø xyajcuhwäätsäm, møød coo hajxy hñajty tøø xyajpädsøømäm haxøøgtuum.

³¹ Cab hajxy mnixiøøghájtänät. Cab hajxy mnimiäd-siphájtänät. Cab hajxy mnimiäjootmä'tänät. Cab hajxy mnihójjänät. Cab hajxy mniñähójjänät. Cab hajxy mnimiähanhájtänät. ³² Pero, mniçhoc mnimiee'xøøjäp hajxy hamiñ haxøpy. Mniñäxuudsøøjäp hajxy jaduhñ. Mnimiee'xøøjäp hajxy jaduhñ. Hix, jaduhñä Dios hajxy tøø xmié'e'xäm ja'a Jesucristocøxpä.

5

¹ Xyhuunghájtämä Dios hajxy; xchójcäm hajxy jaduhñ. Naxiä Dios hajxy ndehm piahíjxämät. ² Mniçhoc mnimiee'xøøjäp hajxy nebiä Jesucristo hajxy xchójcäm. Coo hajxy jaduhñ xchójcäm, paady hajxy tøø xñähho'túutäm. Quiumaayy ja'a Dios jaduhñ.

³ Coo ja'a Dios hajxy xyhuunghájtäm, paady hajxy haxøøg mga'a nä'ägädä jatcø'øwät. Ni mga'a had-sógät jäya'adio'oxiøjc hajxy. Jaanä jaduhñ mijts to'oxiøjc-hajxypä, caj mijts wiingya'adiøjc mmøødmáabät. Ni mga'a hadsójcät hajxy ja'a mmädo'oxiøjcä ñihyhap. Ni cab hajxy mhaxøøgcápxät. ⁴ Cabä haxøøghaaw hajxy mmøødhádät. Cab hajxy mguhhinmädiá'agät. Cab hajxy mhanähádät. Cab jaduhñ yhawiinmatsä coo hajxy jaduhñ mjatcø'øwät. Pero ja'a Dios hajxy mnämä'awäp: "Dioscujú'uyäp." ⁵ Tøyhajt jaduhñ, pøn haxøøg jatcøøby, pøn

jäya'ajie'e jaančh tehṃ yhadsojp, cab jim̄ tiägø'owa'añ maa ja'a Jesucristo wyiinduumän, maa ja'a Dios ja'a wyiinduumän. Hix, pøn̄ jäya'ajie'e hadsojp, cabä Dios hoy wyiingudsähgø'oy. ⁶ Cab hajxy nyajwiinhóhñämät coo jäya'ay hajxy hänajty xjia nämáayyämät cooc tyijy yhooyä coo hajxy haxøøg njatcøoyyämät, nébiäts naamñä tøø nmägapxy tøø nhane'emiän. Ja'a häna'c-hajxy ca'a mäbøjpä, ja'a häna'c-hajxy jaduñ haxøøg jatcøøbiä, nébiäts naamñä tøø nmägapxy tøø nhane'emiän, yajcumädowáañäp hajxy je'eduhñ ja'a Diósäm. ⁷ Paady jaduñ, tsøc ca'a møødjatcøoyyäm näguipxy.

⁸ Mijts, cabä Diosmädia'agy hajxy hijty mmädoyyä. Mhaxøøgwädijp hajxy hijty, møød hajxy hijty haxøøgjaty njatcø'oy. Pero coo ja'a Jesucristo miädia'agy hajxy tøø mmäbójcänä, paadiä mwiinmahñdy hajxy mmøødän hawa'adstuum. Jaduhñä mwiinmahñdy hajxy mjaac yaghídät. ⁹ Pøn̄jatiä wyiinmahñdy hawa'adstuum, hojioot hajxy miøød. Hoy hajxy jiäya'ayhaty. Tøguiapxp tømíädiacp hajxy je'e. ¹⁰ Mjaac habøgäp hajxy jaduñ nebiatiä Dios hajxy xyajnahixø'oy neby hajxy jaduñ maas hoy mjäya'ayhádät. Jaduhñä Jesucristo hajxy xmiaas cumáyät. ¹¹ Ja'a häna'cä Diosmädia'agy hajxy ca'a mäbøjpä, cab hajxy hoy jiäya'ayhaty. Cab hajxy jaduñ cøxypänejpä mmøødjatcø'owät; pero mwiinguhojø'owäp hajxy jaduñ. ¹² Jaančh tehṃ yhočähdiuunnä hajxy hamee'ch jiatcø'oy; páadyhöch nga'a nägapxa'añ nebiaty hajxy jaduñ jiatcø'oy. ¹³ Coo jäya'ay hajxy nwiinguhojøoyyämät coo hajxy yhaxøøgwädity, nebiä Diosmädia'agy miäna'añän, mänit hajxy jaduñ yhooc tehṃ ñajuø'owät coo hajxy tøyhajt yhaxøøgwädity. ¹⁴ Jaduhñä jäya'ayhajxy näje'e miäna'añ: Pøn̄ jaduñ maab, ma'abiädø'og hajxy; pøn̄ jaduñ tøø yho'ogy, mjujyipiøjtägátsäp hajxy.

Ja'a Jesucristo mijts xquiujaajaamb xquiudø'xaamb. Jaduhñ miädia'agytiägø'øy, pønä Diosmädia'agy ca'a mäbøjp, ween hajxy miäbøcy. Jaduhñä Jesucristo hajxy xyajwiinjuø'øwät coo je'eyyä jaduhñ tu'uquiä ja'a mbojpa mgädieey hajxy xyajnahwäatsät.

¹⁵ Jaduhñds je'e, nägüeentä hajxy mwädítät. Cab hajxy mnibiäda'agøøjät nebiä jäya'ayä Diosmädia'agy hajxy ca'a wiinjuøbiän. Paady hajxy hoy mwädítät coo ja'a Diosmädia'agy hajxy mwiinjuø'øy. ¹⁶ Naxy hajxy hoy mdehm wiädítät. Hix, jiaanç tehñ miäwädiippiä jäya'ayä haxøøgwiinmahñdy hajxy jäda'ahaty. ¹⁷ Hoorä, cab hajxy mnibiäda'agøøjät nebiä jäya'ayhajxy ca'a ja-jpän. Naxiä Dios ja'a miädia'agy hajxy mdehm wyiinjuøyyät mdehm wyiinmädoowät nebiatiä jioot chocy coo hajxy mgudiúunät. ¹⁸ Cab jaduhñ yhooyä coo hajxy mmu'ugøøjät; yajtägoobiä jocnøø jaduhñ. Pero weenä Dioshespíritu hajxy xjiaac puhbéjtäm coo ja'a miädia'agy hajxy jaduhñ njaac cudiúunäm. ¹⁹ Coo ja'a Dioshespíritu hajxy xpiuhbéjtäm, jaduhñ hajxy nnijiootcapxmøpcójcäm ja'a Dioshøyhaam. Jaduhñä Dios hajxy hamuumdu'joot mwiinhøw mwiinyá'axät. ²⁰ Hoy miäduhñajtä Dios hajxy mnämä'awät: “Dioscujú'uyäp”, ja'a Jesucristocøxpä, ja'a hajxy nWiindsøn_hájtämbä. Paadiä Dios hajxy jaduhñ mnämä'awät: “Dioscujú'uyäp”, coo ja'a hoyhajtä weenhajt hajxy je'e xmióoyyäm. Hix, je'e hajxy nDeedyhájtäm.

²¹ Hoorä, coo ja'a mmähermano waamb xyhané'emät, hamuumdu'jootä miädia'agy mgudiúunät, je'eguiøxpä coo ja'a Jesucristo hajxy hoy nwiingudsähgøoyyäm.

²² Mijts to'oxiøjc-hajxy, mgudiúunäbä mnihyhapä miädia'agy hajxy. Jaduhñä Jesucristo hajxy xyhane'emy, ja'a hajxy nWiindsøn_hájtämbä. ²³ Coo ja'a mnihyhaphajxy quiopc-haty maa mijtsän, jaduhñ mäwiin miäbaady coo

ja'a Jesucristo hajxy nWiindsøn

h

ajtäm coo ja'a miädi-a'agy hajxy hoy nmäbójcäm. Jaaya'ay hajxy xyajnähwáatsäm. ²⁴ Coo ja'a Jesucristo miädia'agy hajxy ngudiúunäm, jadu

h

 mijtsä mnihyhapä miädia'agy mgudiúunäbät, waambaty hajxy jadu

h

 xyhane'emy.

²⁵ Hoorä, mijts ya'adiøjc-hajxy, mdsógäp mmée'xäbä mdo'oxiøjc hajxy nebiä Jesucristo hajxy xchójcäm. Hi

x

, tøø hajxy xñäho'túutäm. ²⁶ Paady hajxy tøø xñäho'túutäm, jadu

h

 hajxy tøø xyajnähwáatsäm ja'a nbojpä ngädieeyhajtäm. Paady hajxy jadu

h

 tøø xyajnähwáatsäm coo ja'a miädia'agy hajxy tøø nmäbójcäm. Y coo hajxy nnäbéjtäm, jadu

h

 hajxy nmänáanäm coo ja'a nbojpä ngädieey hajxy tøø xñähwáatsäm. ²⁷ Paadiä Jesucristo hajxy tøø xñäho'túutäm, jadu

h

 hajxy hoy yaxón xyhíjxämät nebiä pu^y nebiä je'e

ch

pän coo hánajty yaa quiadaactägatsa'añ. Hi

x

, tøø ja'a nbojpä ngädieey hajxy hánajty xyajnähwáatsäm. ²⁸ Jaduh

h

nds je'e, mijts ya'adiøjc-hajxy, mdsógäp mmée'xäbä mdo'oxiøjc hajxy nebiä mhamdsoo ni'x nebiä mhamdsoo copc hajxy mjuø'øyän. Pønä tio'oxiøjc tsojp mee'xp, jadu

h

 miäbaady nebiä yhamdsoo ni'x nebiä yhamdsoo copc choquiän. Hi

x

, tu'ugni'x tu'ugcopc hajxy jiaty coo to'oxiøjc hajxy wyiingpøcy. ²⁹ Hi

x

, cap pønä yhamdsoo ni'x yhamdsoo copc xiøøghaty. Pero ngüeendähajtämä nni'x ja'a ngopc-hajtäm hajxy; jadu

h

 mäwíinäts miäbaady nebiä Jesucristo hajxy xcwieendähajtäm. ³⁰ Hi

x

, tu'ugjoot tu'ugwiinmahñdiä Jesucristo hajxy xmiøødhíjtäm coo hajxy nWiindsøn

h

ajtäm. ³¹ Jaduh

h

nä Diosmädia'agy miäna'añ: “Jaduh

h

nds je'e, coo ja'a ya'adiøjc to'oxiøjc piaady, mänitä tiaj tieedy piuhyohdiuutnä. Jaduh

h

 mäwíinädsä ya'adiøjc-hajxy jiaty møødä tio'oxiøjc nebiä tu'ugni'x nebiä tu'ugcopcän.” ³² Jaan

ch

 teh

m

 yajxón hädaa mädia'agy jadu

h

. Cabä Dios hajxy hijty xchoj yajwiin-

juøyyäm. Jaduhñch nwiinjuø'øy, coo ja'a ya'adiøjcä tio'oxiøjc miøødhity tu'ugmädia'agy, coo jaduhñ miøødhity tu'ugni'x tu'ugcopc, jaduhñ mäwíinäts miäbaady coo ja'a Jesucristo hajxy xmiøødhíjtämbä tu'ugmädia'agy coo ja'a miädia'agy hajxy nmäbójcäm. ³³ Jaduhñds je'e, jaduhñä mdo'oxiøjc hajxy mdsoc mmée'xät nebiä mhamdsoo ni'x nebiä mhamdsoo copc hajxy mdsocquiän. Y mijts to'oxiøjc-hajxy, jaaná jaduhñä mnihyhap hajxy mwiingudsähgøøbiät.

6

¹ Mijts pigäna'tøjc-hajxy, mgudiúunäbä mdajjä mdeediä miädia'agy hajxy ja'a Jesucristocøxpä, ja'a hajxy nWiindsønñhájttämbä. Hahixøøby jaduhñ coo hajxy jaduhñ mgudiúnät. ²⁻³ Jaduhñä Diosmädia'agy miäna'añ: "Pønjataiä tiaj tieedy wiingudsähgøøby, je'eçh hajxy hoy nyajtsäna'awaamby nyaghäyowaamby hädaa yaabä naaxwiin; je'eçh hajxy jejcy nyagjuyhadaamby", nõmä Diosmädia'agy miäna'añ. Coo ja'a Dios hajxy jaduhñ jecy xyhanéhmäm, mänit jaduhñ miänaandsöhñ coo ja'a mayhajt hánajty tiuna'añ ja'a højtscøxphtëm.

⁴ Mijts taj teedyhajxy, cabä mnøøx cabä mmajc hajxy hanaxiä mhójtät coo hajxy xmiähanñhädät. Jaduhñä mhung hajxy mmägäp mhané'emät coo hajxy hoy wiädítät. Jaduhñ hajxy quimayøøjtät ja'a Jesucristäm, ja'a hajxy nWiindsønñhájttämbä.

⁵ Näje'e mijtsä jäya'ayhajxy xjie'ehaty nebiä waj nebiä cuaayän. Mgudiúunäbä mwiindsønñä miädia'agy hajxy hamuumdu'joot, ja'a hajxy hädaa yaabä naaxwiimbä. Mwiingudsähgøøwäp hajxy jaduhñ nebiä Jesucristo hajxy nwiingudsähgøøyyäm. ⁶⁻⁷ Hoyyä jäya'ayhajxy tiuñ coo ja'a wyiindsønñ hajxy hánajty wyiindäna'ayii neby

hajxy jaduh_n quiumayóøjät ja'a wyiindsónäm. Pero nä-
je'e jäya'ayhajxy hoy quia'a tuñ coo ja'a wyiindsónhajxy
hänajty quia'a jimä. Mijts, cab hajxy jaduh_n mbahíxät.
Hamuumdu'jootä mwiindsón hajxy mmädúnät. Jaduh_n
hajxy hoy myajcähxó'øgät coo ja'a Jesucristo hajxy
hoy mjaančh mäduñ. Jaaya'ay hajxy nmaas Wiind-
sónhajtäm. Jaduh_nä Dios chojpä. Ja'a Jesucristocøxpä
hajxy jaduh_n mdúnät. Ca'a jäya'aguiøxpähajtiä hajxy
mdúnät. ⁸ Mjahmiédsäp hajxy jaduh_n, coo ja'a nwiind-
són hajxy hoy nmädúunämät, hoy hajxy xjia je'ehajtäm
nebiä waj nebiä cuaayän, mänitä Jesucristo ja'a hoyhajtä
weenhajt hajxy xmióoyämät.

⁹ Jaduh_n mijtspä, cumoonsädøjc, mnäxúudsäbä
mmoonsä hajxy jaduh_n. Cab hajxy mhadsähgó'øwät.
Haa ca'a, jaduh_n mijtsä Dios hajxy xyhanehm_{bä} nebiä
mmoonsä hajxy xyhanéhm_{bän} ja'a Diósäm, ja'a jim
tsajpootypä. Haa ca'a, cabä Dios hajxy wiing xyhíjxäm.
Haa ca'a, tu'ugjäya'ayhajtäm hajxy nägøxiä.

¹⁰⁻¹¹ Hoorä, mänuu'xta'agä Dios hajxy coo hajxy ween
xpiuhbety ja'a miäjaahaam; jaduh_nä miädia'agy hajxy
maas hoy mjaac mäböjät. Hi_x, jaančh teh_m miäwiinhøh-
m_{bä} møjcu'ugong. Pero jiaančh teh_m miøødä Dios mäjaa.
Y coo hajxy jaduh_n xpiuhbédät, cabä møjcu'ugong hajxy
jaduh_n myajmäjädá'agät. ¹² Hi_x, ja'a møjcu'ugong hajxy
yaa xmiädsibøoyäm møødä mioonsä hajxy, ca'a jäya'ay-
hajxiä ja'a hädaa yaabä naaxwiimbä. Haxøögä møjcu'uhaj-
xy jäya'ayhaty. Pojhaam hajxy wiädity. Cabä ni'x copc
hajxy tieh_m miøødä neby højtshajtäm. Møcä mäjaa hajxy
jiaančh teh_m miøødä. Ja'a hädaa yaabä naaxwiimbä
haxøögjäya'ayhajxy hanéhm_{bä} møjcu'ugóngäm. Hoy
chajtcøxpä ja'a møjcu'uhajxy wiädity. ¹³ Paadiä Dios ha-
jxy mmänuu'xtá'agät coo hajxy ween xpiuhbety ja'a miä-
jaahaam. Jaduh_nä møjcu'ugong hajxy hoy mjøjtänä'awät.

Jaduhñ hajxy mga'a yajmäjädá'agät. ¹⁴ Jøjtána'awxä ja'a møjcu'ugong hajxy. Naxy hajxy hoy miánaaxøøjä mdehm̄ tiømiädiá'agät. Jaduhñ hajxy hoy mmee'xtúgät. Jaduhñ mäwíinäts miäbaady nebiä soldadohajxy mœc ñi-wiøhnta'açhiiján coo hajxy hänäjty chiptuna'añ. Naxy hajxy hoy yajxón mdehm̄ wiädítät. Jaduhñä Dios hajxy xñwá'anät. Jaduhñ mäwíinäts miäbaady nebiä soldado latapujxt hajxy yajniguiaačhjubø'øyijän. Jaduhñ hajxy hoy miäjäda'aga'añ. ¹⁵ Niyhahixø'owøø hajxy nebiä Diosmädia'agy hajxy jaduhñ hoy mmäwädítät. Coo jäya'ayä Diosmädia'agy hajxy miäbøgät, jaduhñ hajxy jootcujc yhidät. Jaduhñ mäwíinäts miäbaady nebiä soldadohajxy ñiyhahixø'øyijän coo ja'a quiø'øg hajxy piägø'øy. ¹⁶ Naxiä Dios ja'a miädia'agy hajxy mdehm̄ miäbøjcät coo ja'a Jesucristo hajxy tøø xyajnähwáat-säm. Jaduhñä møjcu'ugong hajxy mga'a yajmäjädá'agät. Jaduhñ mäwíinäts miäbaady nebiä soldado escudo hajxy yajniyhawähajtugyijän neby hajxy jaduhñ quia'a tøpxøjät ja'a tøpxquepty tóoyyap queecpä. ¹⁷ Naxiä Diosmädia'agy hajxy mdehm̄ miäbøgät coo ja'a Jesucristo hajxy tøø xñähho'túutäm. Jaduhñ mäwíinäts miäbaady nebiä soldado pujxcuhjup hajxy miøødän. Naxiä Diosmädia'agy hajxy mdehm̄ yhabøgät nebiä Dioshespíritu hajxy xyajnähixø'oyyäm. Jaduhñ mäwíinäts miäbaady nebiä soldadohajxy espadacap chiptuñän. ¹⁸ Coo ja'a Dios hajxy mba'yá'axät, mmäyujwá'anäp hajxy tijaty hajxy hänäjty myajmaajiajpy. Mmäyajtówäbä Dios hajxy ja'a yhEspírituhaam tijaty hajxy mmäyujwá'anäp. Mmänuu'x-tá'agäbä Dios hajxy ja'a jäya'aguiøxpä, ja'a Diosmädia'agy hajxy panøcxpä. Cab hajxy mnänuuxø'øwät coo ja'a Dios hajxy hänäjty mba'ya'axa'añ. ¹⁹⁻²⁰ Møød høøčhcóxpøchä Dios hajxy xpia'yáaxäbät coočhä Dios xñajtscapxø'oyyät waambátyhöch ngapx nmädiá'agät coočhä miädia'agy

hänajty nyajwa'xä, ja'a hijty yaghijpiä cuyu'uöch. Ja'a Dióshøch jaduñ xwyiinguejx coöchä miädia'agy jaduñ nyajwá'xät. Páadyhøch chaa ndsumyčhäna'ay ja'a Diosmädia'agyquiøxpä. Jadúñhøchä Dios hajxy xpi-a'yáaxäbät coöch nga'a tsähgø'owät coöchä miädia'agy hänajty nyajwa'xä, nébiøch jaduñ hoy ngudiúnät.

²¹⁻²² Nguexáambiøchä hermano Tíquico jim maa mi-jtsän. Coö jim miédsät, jim hajxy jaduñ xhawáanät nebiaty højts chaa ngudiñ nguñaxy, coö højts hoy ween nhity, neby hajxy jaduñ mga'a jootmayhájnät ja'a højtsøxpä. Hóyhøchä hermano Tíquico nmøod-nijootpaadyii. Hóyhøch jaduñ xmiøøduñ ja'a Jesucristocøxpä.

²³ Ween mijtsä Diosteedy hajxy xmio'oy ja'a hoy-hajtä weenhajt møødä Jesucristo, ja'a hajxy nWiind-søñhajtämbä. Weenä Dios hajxy xpiuhbety nebiä miä-dia'agy hajxy maas hoy mjaac mäbøjcät, neby hajxy jaduñ maas hoy mničhoc mnimiee'xøjät. ²⁴ Weenä Dios ja'a mayhajt tiuñ ja'a højtsøxpähajtäm nägøxiä coö ja'a Jesucristo hajxy nwiingudsähgøøyyäm hamuumdu'joot, ja'a hajxy nWiindsøñhajtämbä. Tøyhajt jaduñ. Amén.

El Nuevo Testamento en mixe de Guichicovi **New Testament in Mixe, Isthmus (MX:mir:Mixe, Isthmus)**

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Isthmus

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
